

Jólaskemmtanir 19. desember

Nemendur eiga að mæta í bekkjarstofur og umsjónarkennari fylgir þeim í hátíðarsalinn. Vinabekkir eru saman á jólaskemmtun. Gengið er í kringum jólatréð, sungið og dansað. Nemendur í 2., 4. og 6. bekk sjá um skemmtiatriði og nemendur í 5. bekk flytja helgileik. Nemendur fara heim að lokinni skemmtun en opið er í Krakkakoti fyrir þá nemendur sem eru þar.

Kl. 9:00 -10:30

1.SG - 2.EÞ,
4.bekkur - hópur 1
5.BS - 5.ÓS
6.bekkur - hópur 1
7.AH - 7.GA



Kl. 11:00 -12:30

1.MH - 2.HG
3.OS
4.bekkur - hópur 2
5.AL
6.bekkur - hópur 2
7.RF

Opnun tómstundaheimilis Flataskóla

Tómstundaheimili grunnskóla Garðabæjar verða opin í jólaeyfi eins og auglýst hefur verið. Boðið verður upp á dvöl frá kl. 8:00 – 17:00 alla þessa daga, annað hvort hálfan dag eða heilan dag. Foreldrar hafa fengið bréf heim með upplýsingum um það og síðasti dagur skráningar er 5. desember.

Kennsla að loknu jólaeyfi hefst þriðjudaginn 6. janúar 2009

Starfsfólk Flataskóla sendir nemendum og fjölskyldum þeirra bestu óskir um gleðiríka jólahátíð og farsæld á komandi ári.

Upplýsingar: Allir eru hvattir til að fylgjast með skólastarfinu á heimsíðu skólans <http://www.flataskoli.is> en við reynum eftir fremsta megni að uppfæra upplýsingar og koma tilkynningum á framfæri ásamt pósti til foreldra/forráðamanna eftir því sem við á.

Flataskóli við Vífilisstaðaveg

Sími: 565-8560

Fax: 565-7499

Netfang: flataskoli@flataskoli.is

Heimasíða: <http://www.flataskoli.is>

Útgefandi: Flataskóli

Ábyrgðarmaður: Sigurveig Sæmundsdóttir

Ritstjórn: Stjórnendur Flataskóla



Fréttabréf Flataskóla

2. tbl. 24.árg. desember 2008

Aðventuguðspjónusta

Sunnudaginn 14. desember kl. 11:00 verður hin árlega aðventuguðspjónusta í Vídalínskirkju fyrir nemendur, foreldra og starfsfólk Flataskóla. Þar munu nemendur skólans koma fram og aðstoða við guðspjónustu með tónlist, upplestri og helgileik. Við hvetjum nemendur og fjölskyldur þeirra til að taka þátt í guðspjónustunni.



Jólafondur Foreldrafélags Flataskóla

Jólafondur foreldrafélagsins verður næstkomandi laugardag 29. nóv kl. 11 til 14. Við ætlum að eiga notalega stund saman, hlusta á jóla-tónlist, sötra heitt kakó / kaffi og dunda við eitt og annað saman.

Frá skólastjóra

Nú er hafið 50. starfsár Flataskóla. Afmæli skólans er merkis viðburður í sögu hans og einnig í sögu Garðabæjar. Í skólanum hefur á umliðnum árum verið unnið að metnaðarfullu starfi sem hefur verið í stöðugri þróun. Mikil áhersla er þó lögð á að varðveita og hlúa að þeim gildum sem lögð hafa verið í skólastarfinu. Afmælisins verður minnst með margvíslegum hætti á skólaárinu. Segja má að upphaf afmælisársins hafi verið 30. ágúst þegar nokkrir af fyrrverandi nemendum skólans komu í heimsókn. Þetta voru nemendur sem byrjuðu í 1. bekk í Flataskóla 1958. Í október var haldin sérstök afmælisveisla þar sem allir nemendur og starfsmenn komu saman í hátíðarsalnum og gæddu sér á afmælisköku. Afmælisskák-mót skólans var haldið í október og einnig var öllum nemendum boðið á brúðuleiksýningu. Það var Bernd Ogrodnik sem sýndi leikritið Pétur og úlfinn og Umbreytingu. Dagur íslenskrar tungu var haldinn með sérstaklega hátíðlegri dagskrá. Nýr skólasöngur var frumfluttur þennan dag. Þá færði Foreldrafélag Flataskóla skólanum að gjöf hátíðarfána og einnig útifána. Nú er unnið að gerð afmælisrits og útikennslustofa verður vígð á afmælisárinu.

Á vorönn verður síðan unnið að þemaverkefnum sem verða á sýningu í vor. Afmælisárinu mun síðan ljúka með glæsilegri hátíð þann 6. júní sem haldin verður í samstarfi við foreldrafélag skólans.

Skólastarfið hefur gengið vel í vetur og nemendur standa sig með prýði. Öflugt starf hefur verið í bekkjunum og nokkrir bekkir hafa haldið bekkjarkvöld. Nemendur 7. bekkja fóru í skólabúðir í Reykja-skóla í Hrótafirði. Ferðin tókst mjög vel og fengu nemendur bestu umsögn frá starfsfólkinu á Reykjum.

Unnið er að þremur þróunarverkefnum á þessu skólaári: *Byrjendalæsi í 1. – 3. bekk*, *Útikennsla í Flataskóla* og *Comeniusarverkefni* sem er samstarfsverkefni nokkurra Evrópulanda. Hjördís Ástráðsdóttir tónmenntakennari vinnur að því verkefni með nemendum 1. bekkja.

Ný lög um grunnskóla hafa tekið gildi. Ýmsar breytingar hafa verið gerðar á lögnum og má þar nefna að við grunnskóla skal starfa skólaráð. Í skólaráði eiga sæti fulltrúar skóla, foreldra og nemenda. Ráðinu er ætlað að vera samráðsvettvangur skólastjóra og skóla-samfélags um skólahald. Skólaráð Flataskóla var formlega stofnað 25. nóvember og mun taka til starfa í janúar 2009. Einnig er lögfest að við grunnskóla skuli starfa foreldrafélag.

Nú er að hefjast jólaundirbúningur í skólanum. Við munum eins og áður leggja áherslu á að nemendur geti notið þess í rólegheitum og að aðventan verði þeim til gleði.

Í tilefni af afmæli Flataskóla færir Góa öllum nemendum hlaupahjól að gjöf. Næstu viðburðir á vegum foreldrafélagsins eru: Jólaföndrið sívinsæla sem verður á dagskrá laugardaginn 29. nóvember kl. 11-14. Fræðslufundur fyrir foreldra og nemendur í 7. bekk sem verður haldinn þann 15. janúar 2009 kl. 8:30-10 í hátíðarsal skólans. Á fundinum mun Páll Ólafsson félagsráðgjafi á fjölskyldusviði Garðabæjar flytja fyrirlesturinn "Tíu ráð til foreldra" sem fjallar um mikilvægi góðra samskipta í fjölskyldum og mögulegar leiðir til að bæta þau samskipti. Páll er félagsráðgjafi og hefur unnið í barnavernd í bráðum tíu ár. Hann er mikill áhugamaður um framkomu fólks og hefur aflað sér þekkingar um aðferðir til að bæta samskipti fólks (Restitution). Páll er einnig faðir fimm barna og hefur þar með reynslu í mikilvægi þess að hafa góð samskipti innan fjölskyldunnar. Tíu ráð til foreldra er fyrirlestur sem haldinn hefur verið undanfarin ár fyrir foreldra og börn í öllum 7. bekkjum í Garðabæ. Forsenda fyrir öflugu starfi foreldrafélagsins er velvilji og þátttaka allra foreldra. Foreldrafélaginu er ekki heimilt að fá lista yfir nöfn og kennitölur foreldra og verðum við því að reiða okkur á greiðslur inn á reikning félagsins nr. 0546-14-602268, kt. 691102-2620. Árgjaldið er kr. 1.500 fyrir fjölskyldu og foreldrar eru hvattir til að leggja meira af mörkum í tilefni afmælisársins.

F.h. foreldrafélags Flataskóla, Kristinn Tryggvi Gunnarsson, formaður



Fréttir frá foreldrafélagi Flataskóla

Markmið foreldrafélagsins er að efla samstarf heimila og skólans þannig að það leiði af sér öflugra skólastarf með menntun, heill og hamingju nemenda að leiðarljósi. Foreldrafélagið á einnig að vera samstarfsvettvangur foreldra sem uppalenda. Foreldrastarf er einn af hornsteinum skólastarfsins. Virkt foreldrafélag er mikill styrkur fyrir skólastarfið auk þess að gott samstarf milli foreldra og einstakra nemenda og umsjónarkennara er mjög mikilvægt vegna námsins og hefur áhrif á það hvernig öllum nemendum líður í skólanum. Starfsemi foreldrafélagsins er alfarið á hendi foreldra. Það hversu vel tekst til í starfi félagsins er því að öllu leyti undir okkur foreldrum komið.



Starf félagsins er breytilegt milli ára en þó hefur myndast hefð fyrir ákveðnum viðburðum. Haustið var haldin 6. september sl. þar sem m.a. var poppað á langeldi og skoppað á risahoppukastala. Sameiginlegur merktur skólafatnaður var pantaður frá 66°Norður. Í tilefni af 50 ára afmæli skólans færði foreldrafélagið skólanum glæsilega fána með merki skólans. Bekkjarfulltrúar hafa verið iðnir við að skipuleggja bekkjarkvöld þar sem þátttaka hefur farið fram úr bjartsýnustu vonum okkar.



Dagur íslenskrar tungu

Dagur íslenskrar tungu var haldinn hátíðlegur 14. nóvember síðast liðinn. Hátíðardagskrár voru unnar og fluttar af öllum nemendum



skólans frá 1. upp í 6. bekk. Listrænn stjórnandi var Hjördís Ástráðsdóttir og verndari Helga María Guðmundsdóttir. Nemendur úr 7. bekkjum sáu um kynningar og upplestur á milli þátta, þar sem stiklað var á stóru í lífi og starfi Jónasar Hallgrímssonar. Hátíðardagskrárnar fóru í alla staði mjög vel fram og var það mál manna að nemendur skólans hefðu staðið sig framúrskarandi vel, bæði sem flytjendur og áheyrendur. Dagskrárnar

voru bornar uppi af tónlistaratriðum og spunaleik um tröllskessuna Gilitrutt sem nemendur höfðu æft frá lokum ágústmanaðar. Nýr skólasöngur var frumfluttur af kórskóla Flataskóla að viðstöddum Haraldi Haraldssyni ljóðskáldi og Þóri Baldurssyni tónsmið. Margir boðsgestir og hollvinir heiðruðu skólann með nærveru sinni þennan dag. Dagurinn var einn af mörgum hátíðardögum sem sérstök rækt er lögð við á 50 ára afmælisári Flataskóla. Dagur íslenskrar tungu hefur náð traustri fótfestu í skólamenningu Flataskóla, eins og í samfélaginu öllu og ber hátt í annars metnaðarfullu listalífi skólans. Á degi sem þessum gefst nemendum tækifæri til að flytja og kynna íslenskri menningararfleifð sem skilar ómældum árangri út í skólasamfélagið.

Hjördís Ástráðsdóttir, tónmenntakennari



Skólabókasafnið

Starfsemi skólasafnsins hefur verið fjölbreytt það sem af er vetri. Verkefnavinna nemenda á safninu hefur verið töluverð og farið vaxandi sem er mjög ánægjuleg þróun. Ýmsir viðburðir hafa einnig verið á safninu á haustönn og verða gerð skil á nokkrum þeirra í þessum pistli.

Nemendur af erlendum uppruna

Undanfarin ár hefur tungumáladagurinn 26. september verið haldin hátíðlegur á skólasafninu með því að vekja athygli á nemendum okkar sem eru af erlendu bergi brotin. Í vetur útbjó bókasafnsfræðingur skólans kynningu á erlendu nemendum sem eru 38 talsins nú í ár. Öllum árgöngum var boðið á safnið að horfa á kynninguna ásamt bekkjarkennurum. Kynningunni var ætlað að gefa innsýn í menningu og fjölbreyttan bakgrunn nemenda hér í skólanum. Þekking og virðing á menningu annarra þjóða er undirstaða samheldni, umburðarlyndis og eflir skilning á mismunandi siðvenjum og tungumálum.



Ferðabangsinn Sveinbjörn

Við í Flataskóla höfum haldið bangsaviku undanfarin ár í kringum alþjóðlega bangsadaginn sem er 27. október. Yngstu nemendur skólans koma þá með bangsa að heiman í bókasafnstímann sinn og hlýða á sérstaka bangs dagskrá. Bangsavikan í ár var óvenjuleg því við höfum eignast sérstakan ferðabangsa og var hann kynntur nemendum skólans. Ferðabangsinn heitir Sveinbjörn en hann kom til Íslands með aðstoð nemanda úr Flataskóla. Sveinbjörn hefur aðsetur á skólasafninu en hann langar að ferðast sem mest bæði innan lands og utan með aðstoð nemenda og starfsfólks skólans. Sveinbjörn hefur þegar ferðast bæði með einstaka nemendum og einnig fór hann í ferð með 7. bekkjum að Reykjum í Hrútafirði.



Lestraráttak

Lestur og lestrarhvatning er afar mikilvægur þáttur í starfsemi safnsins en markmiðið er að gera nemendur skólans að áhugasömum lesendum jafnt á skáldrit sem fræðirit. Góð lestrarkunnátta er undirstaða fyrir góðum námsárangri nemenda til framtíðar. Skólasafnið stendur því fyrir ýmsum lestrarhvetjandi viðburðum til þess að örva nemendur til þess að lesa og styrkja lestrarkunnáttu sína. Lestraráttak hefur nú t.d. verið haldið í 3., 4., 5., 6. og 7. bekkjum undanfarnar vikur. Hvert áttak stóð yfir í eina viku en markmiðið með lestrarátaki er að vekja áhuga nemenda á lestri góðra bóka. Áhugi nemenda eykst mikið á lestri eftir slík átök sem sést best á mun meiri útlánum bóka af safninu. Mikilvægt er að halda lestrarátak árganganna strax á haustönn eins og verið hefur undanfarin ár því lestraráhugi nemenda vaknar við þennan mikla lestur sem viðhelst í langan tíma á eftir.



Skáld í skólum

Heimsóknir rithöfunda í skólann vekja ávallt áhuga nemenda og eru til þess fallnar að ýta enn frekar undir áhuga þeirra til þess að lesa sér til ánægju. Rithöfundarnir Þórarinn Eldjárn og Olga Guðrún Árnadóttir heimsóttu nemendur í 6. bekk í haust. Dagskráin sem þau fluttu á skólasafninu var mjög skemmtileg og náðu þau vel til barnanna. Íðunn Steinsdóttir, rithöfundur og Hjörleifur Hjartarson, rithöfundur og þýðandi fluttu dagskrá fyrir nemendur í 1.-3. bekk. Þau ferðuðust með nemendum um ævintýraheima þar sem ólíklegustu og jafnvel stórhættulegar skepnur komu við sögu. Íðunn sagði þeim frá Drekasögu en Hjörleifur las úr bók sem hann hefur þýtt og heitir, *Skaðræðis-skepnur*.

Rithöfundurinn Kristín Helga Gunnarsdóttir og myndlistarmaðurinn Halldór Baldursson fluttu dagskrá á skólasafninu fyrir nemendur í 4. og 5. bekk. Kristín Helga las upp úr nýjustu bók sinni um Fíusól. Halldór sem myndskreytt hefur allar bækurnar um Fíusól sýndi nemendum hvernig hún varð til á teikniborði hans. Hann notaði teikniforrit til þess að sýna þeim hvernig hann getur búið til og breytt myndum sínum í tölvunni, áður en þær birtast í bókunum. Í lokin gaf Halldór nemendum teikningu af manni og bað þá um að semja sögu um hann þegar færi gæfist. Kristín útbjó einnig fyrir þau stuttan og skemmtilegan texta um Fjólu og bað nemendur að myndskreyta textann. Það voru því ánægðir nemendur og uppfullir af frábærum hugmyndum sem yfirgáfu skólasafnið eftir skemmtilega dagskrá, tilbúin að semja sögur og myndskreyta.

Ingibjörg Baldursdóttir, bókasafnsfræðingur